

Bergen, 25.11.20

Vår ref: 2020/1508
Sakshandsamar: Eirin Kongestøl Espeland

Dykkar ref: 20/5067-8

Karmøy kommune

Karmøy, Haugavågen – søknad om dispensasjon for oppdrett av flatøsters

Viser til brev av 27.10.20, med vedlegg, frå Karmøy kommune om ovannemnde sak.

Fiskarlaget Vest har sendt saka til Karmøy Fiskarlag.

Generelle merknader

Fiskarlaget Vest registrerer at ein får mange søknadar om endring av lokalitetar, auka biomasse på eksisterande lokalitetar, samt søknadar om nye lokalitetar. Mange meiner at eitt lite enkelt prosjekt ikkje kan skade, men mange nok avgrensar tilgjengeleg areal for fiske bit for bit. Det er viktig at forholda blir lagt til rette slik at norske fiskarar fortsatt kan skape verdiar av fiske for spesielt kystsamfunna våre. «Sjøvern» er like viktig for fiskerinæringa, som «jordvern» for jordbruk.

Styresmaktene må ikkje føre bit-for-bit-politikk. Ein må vurdere heilheitlege effektar og kva eit større område toler av akvakultur, i tillegg til anna utslepp til sjø. Styresmaktene må **definere** kva som er **akseptabel negativ innverknad** på anna næring.

Akvakulturnæringa må velje gode lokalitetar som ikkje er i konflikt med andre næringar, slik at ein ikkje forureinar eit område for deretter søkje om ny/justert plass. Ein må **unngå** både **arealkonflikt** og forureining/negativ påverknad på viktige **økosystem og fiskeriområde**.

Akvakulturnæringa må **sørgje** for at arealbeslaget på sjøbotn, i form av fortøyingar, blir avgrensa mest mogleg. Ein ynskjer å peike på at bolting (ikkje boltar som fiskereiskap kan hefte i) kan avgrense ankringsområdet.

Det er viktig at akvakulturlokalitetar og tilhøyrande fortøyingar/fester som ikkje er i bruk, blir fjerna. Med dagens fokus på plastforureining i sjø må ein òg førebyggje mest mogleg. Det kan vere dyrt og vanskeleg å rydde opp i ettertid.

Haugavågen

Det er her søkt om dispensasjon frå kommuneplanen for etablering av oppdrett av flatøsters. Yngel skal haustast og overførast til lokalitet Trettøy i Sveio for å utviklast vidare til konsumbruk. Målet med drifta er òg å bevare flatøstersbestanden og hindre spreining av stillehavsøsteren i området.

Det er ikkje registrerte fiskeriinteresser i området, men det blir òg fiska i område som ikkje er registrert. Ein har t.d. «nye» fiskeri som leppefiske og fiske etter sjøkreps.

Ein føreset at rette mynde tar ei vurdering om området er eigna til slikt oppdrett og at det ikkje fører til fortrenging av anna ønska marint liv. Om det blir gjeve løyve, må ein sikra at "lokaliteten" blir rydda om drifta opphører, og det må setjast av bundne midlar til opprydding ved eventuell konkurs.

Til slutt vil ein gjere merksam på at fiskerinæringa er basert på fornybar biologisk produksjon, og er difor avhengig av eit reint og produktivt kyst- og havmiljø mest mogeleg fritt for miljøgifter, framandstoff og legemiddel. Ein har eit stort felles ansvar, både nasjonalt og internasjonalt, for å oppretthalde eit reint og produktivt hav. Det er avgjerande for kvalitet, omdøme og marknadsverdi for norsk sjømat. Det er viktig å førebyggje då det ofte er vanskeleg og dyrt å rydde opp i ettertid.

Med helsing
Fiskarlaget Vest

Britt Sæle Instebo
Dagleg leiar

Eirin Kongestøl Espeland
Rådgjevar

Kopi pr. mail: Karmøy Fiskarlag
Fylkesmannen i Rogaland
Rogaland Fylkeskommune